

Chhuah fan: Oct., 1984

FEBRUARY, 2016

RAMTHAR



**Lungthar Kohhran Biak In, Tuidu Bial
Tripura**

SERMON

A TIH THEIH TÂWK A TI A NI.....phêk 6 - 8

RAMTHAR ASSOCIATION CHANCHINBU THLA KIP CHHUAK EDITORIAL BOARD 2016 - 2018

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pi C. Lalrampári	9436190803 (M)
News Editor	: Pu Lalbiakênga Fanai	9436366234 (M)
Clr. Manager	: Pu Lallawmnakima Hmar	8575178109 (M)
Publisher	: Rev. K. Lalrinmawla	9485140409 (M)

Member-te

Rev. H. Lalrinmawla	: Synod Moderator
Upa H. Ronghaka	: Synod Secretary (Sr.)
Rev. B. Sangthanga	: Executive Secy. I/c Mission

Thu chhuah tûr nei chuan Email - ramtharchanchinbu@gmail.com-ah emaw lehlam chauhah ziakin Editor emaw Manager, Ramthar Chanchin bu, Synod Office, Aizawl, Mizoram (India) hnênah emaw thawn tûr a ni e.

Ramthar Chanchinbua thu chhuah hi a ziaktu mawhphurhna a ni.

KUM KHAT LÂK MAN - ₹ 50/-

A CHHÛNGA THU AWMTE

1. Editor thukhawchâng	- 1
2. Keimahni	- 2-4
3. Ramthar Hluttute Huang	- 5
4. Sermon	- 6-8
5. BUHHMUN AṬANGIN:	- 9-17
(1) Manikbond Pastor Bial Vision	
(2) Chhim Bial Chakma Convention 2015	
(3) Ramhlun North Masihi Sangati...	
6. Mission Field-a hmeichhe țangkaina	- 17-19
7. Pi Rami kha aw!!	- 20-23
8. Chakrata Biak In kha	- 23-24
9. Ramthar Feh	- 25-32



TAKSA HLANNA

Tirhkoh chuan, “Chutichuan, unaute u, Pathian khawngaihna avang hian, inthawina nung leh thianghlim leh Pathian lâwm tlâk ni tûrin in taksa chu inhlanah ka ngen a che u; chu chu in rawngbâwlna âwm rêng a ni,” (Rom 12:1) a ti a. Taksa ngei Pathian hnêna hlan tûra a phut ngamna chhan chu, ‘Pathian khawngaihna avàng hian’ tiin a sawi. Hmâna Pathian mi ni ngai lo, khawvêl mi kha a faah te vuahin an lo âwm tâk avàng chauhvîn an taksa chu Pathian tâna hlan tûrin a ngen ngam a, a chhan pawh Chiang takin a hrilh nghal a ni.

Mihringah hian taksa, rilru leh thlarau a awm a. Heti zâwng pawh hian sawi ta ila a fuh zâwk hial âwm e - ‘mihring hi taksa, rilru leh thlarau infin khâwm a ni’ tiin. Taksa tel lovin thlarau ngawtin emaw, rilru ngawtin emaw Pathian rawng a bâwl theih loh. Kan taksa ngei hi hlâna Pathian rawng hi bâwl tûr a ni. Kan taksa hlan chu Thlarauva Pathian rawng kan bâwl dân tûr (Spiritual Worship) a ni tiin Paulan a sawi. Vawi khat chu kan kohhran chhuahsan pa pakhat hian kan Pastor Quarters kan sak laiin rawn thawha inhlawh ve hi a duh a. “Pu Zau, kohhran hi kan la inti neitu rilru tho a nia,” a ti a. Kei lah chuan, “A nih tak chu, keini pawhin Pastor Quarters sain kan lo ruai rilru ve ang che,” ka ti a. Taksaa kohhrana tel lo, tel rilrûk ringawt chuan awmzia a nei lo va; chutiang bawkin Pastor Quarters saa rawih rilrûk ringawt chuan hna a thawk lo va, a su kaw bawk hek lo. Hei hian taksa ngeia tel a tûlzia a tilang.

Kum 2016 kan hmang fan mék a. Mizoram chhúngah pawh kum thara rawngbâwltu tûr peng hrang hrangah kan inruat thar a. Chutiang bawkin ram páwna rawngbâwla feh chhuakte pawh mahni hnaa tih tûr pual ruatah hma kan la fan mék bawk a. Pathian khawngaihna azárah a rawng bâwl ve tûra Pathianin min lo la duh ve te hi a va han lâwmawm tak êm! Pathian hnênah lâwm thu i sawi ang u. Chutianga Pathianin a rawng bâwl tûra min koh ve tâkah chuan kan hmaa rawngbâwl hna, tih tûr awm apiangte chu rinawm leh dik taka thawkin, kan tâna Krista inhlanna hre rengin keini pawh inhlan thar zêl ila.

Kan taksa hi Pathian rawng bâwl tûra kan inpêk phal chin chinah keimahni leh kan rawngbâwlsakte tán a hlu ang a, kan lallukhum timawituah a lo la chang ang. Chuti ni lova, zelthel taka, rûn dâla, kan taksa leh rilru leh thlarau hlan kim phal lova kan thawh chuan mahni inbum mai kan lo ni ang. Pathianin a khawngaihna avànga a rawngbâwl tûra min kohna phua thawk tûrin mawh kan phur a; chutianga kan thawh theih nán kan taksa ngei hlana a tâna inpêk hi kan mawhpurhna a ni.

.....

KEIMAHNI

† SMB ringthar dinhmun 2015:

S1 No.	Hmun	Hawn kum	Thawktu zat	Ringthar Jan- Dec. '15
1.	Barak	1975	176	137
2.	Tripura	1986	268	1,242
3.	Delhi	1988	29	36
4.	Kolkata	1988	120	590
5.	Siliguri	1988	55	130
6.	Karbi Anglong	1989	207	89
7.	Arunachal 'E'	1991	92	65
8.	Lucknow	1999	69	404
9.	Patna	1999	75	188
10.	Nepal	2000	94	212
11.	Arunachal 'W'	2001	194	431
12.	Home Mission North	1949	146	129
13.	Home Mission South	1987	249	67
14.	Assam	2008	101	48
15.	Jharkhand	2008	130	622
16.	Cachar Tlangram	2009	118	22
17.	Masihi Sangati	1979	198	1,630
18.	Manipur	1967	1	
19.	Orissa	2011	14	23
20.	Cambodia	2010	3	
21.	Mission dang/P.ship		42	
22.	Trainees			
	a) CTE		5	
	TOTAL		2,386	6,065

[Hei hi Official-a dawn chin a ni a, dawn kim loh a aum avàngin hei ai hian ringthar zât hi la thahnem tùra ngaih a ni]

† **TUARPUINA: Pu Lalduhawma, Evangelist,** Hlimen Bial pa, Pu Kamol Bahadur chu ni 17.12.2015 khán Nepal-ah a thi.

Synod Mission Board-in a tuarpui takzet a ni.

† **SYNOD RAMTHAR RAWNGBAWLNAA COMMITTEE MEMBER THENKHATTE:** Synod Ramthar Board Committee (14.12.2015)-in Synod Ramthar rawngbàwnaa Committee member a ruat tharte chu hêng mite hi an ni:

(a) Kum 2016-2018 chhúnga Board Executive Committee member-te:

- 1) Rev. H. Lalrinmawia, Moderator
- 2) Upa H. Ronghaka, Synod Secretary
- 3) Rev. B. Sangthanga, Executive Secretary i/c Mission
- 4) Rev. K. Lalrinmawia, Board Secretary
- 5) Dr. Robert S. Halliday, Coordinator
- 6) Rev. Lalchhuanmawia, Bungkawn
- 7) Rev. K. Lalthangmawia, Chhinga Veng
- 8) Upa F. Lalfakzuala, Dawrpui
- 9) Upa C. Lalngkhakliana, Tuikhuahtlang
- 10) Upa Denghmingthanga, Kulikawn
- 11) Rev. T.C. Laltlanzova, Zonuam
- 12) Upa H. Thangmawizuala, Upper Republic
- 13) Rev. Lalremruata Ralte, Maubawk
- 14) Upa V. Neihkunga, Chanmari
- 15) Upa Zairemmawia, Leitan South

(b) Kum 2016-2018 chhúnga Barak Area Committee-a SMB aiawh turte:

- 1) Rev. K. Lalthangmawia, Chhinga Veng
- 2) Rev. T.C. Laltlanzova, Zonuam

(c) Kum 2016-2018 chhúnga Chhim Area Committee-a SMB aiawh turte:

- 1) Rev. Lalchhuanmawia, Bungkawn
- 2) Upa C. Lalngkhakliana, Tuikhuahtlang

(d) Kum 2016-2018 chhúnga Home Mission North Working Committee member-te:

- 1) Rev. K. Lalrinmawia, Board Secretary (Chairman)
- 2) Dr. Robert S. Halliday, Coordinator (Secretary)
- 3) Rev. B. Sangthanga, E.S. i/c Mission (Ex-officio)
- 4) Mission Promoter, HM North (Recording Secretary)
- 5) Supervisor of Schools, SMB

Member-te:

- 1) Rev. Lalhminghlua, Lallen (Chhawrpial Presbytery)
- 2) Upa C. Zahlira, W. Phaileng (Dampa Presbytery)
- 3) Rev. Dailamthanga, Pangbalkawn (Kolasib Presbytery)
- 4) Rev. Zohmunmawia, Zawlnuam (Khawthlang Presbytery)
- 5) Upa F. Vanlalmawia, Bilkhawthlir (Hmarthlang Presbytery)

† SMB HNUAIA THAWK TÙRA PRO. PASTOR LÂK THARTE:

- 1) D.B. Rai, B.Th., Nepal
- 2) Zorammuana, B.Th., B.D., Armed Veng
- 3) Nirmal Kumar Limbu, BA, B.Th., BD, Bawngkawn East
- 4) Matsam Bo, B.A., B.D., Arunachal East
- 5) Bijen Singha, B.Th., B.D., Bazaricherra
- 6) Tojo Ngamdir, B.Th., B.D., Arunachal West

† KUM 2016-2018 CHHÛNG ATÂNA FIELD SECRETARY RUAT THARTE:

- 1) Delhi – Rev. R. Lalrosiama
- 2) Arunachal & Assam ‘W’ – Rev. R. Lalrinsanga
- 3) Odisha – Rev. Lalramdinthara Colney
- 4) Arunachal North – Rev. Lalhmuchhuaka
- 5) Karbi Anglong – Rev. F. Pachhunga

† KUM 2016 JANUARY THLA ATÂNGA PENSION-A MIN CHAWLHSANTU MISSIONARY-TE:

- 1) Pi Vanlalruati, Home Mission North
- 2) Pu A. Vanlalhruaia, Bru Gospel Team
- 3) Pu Zaihmingthanga, Cachar Tlang
- 4) Pu H. Chawngneihthanga, Gorkha Gospel Team
- 5) Pu Sukhomoni, Chakma Gospel Team
- 6) Pu Janga Bahadur, Presbyterian Hindi Bible School
- 7) Pu M.M. Nymaana, Tripura Field
- 8) Pu Raj Kumar, Barak Area

RAMTHAR HLUTTUTE HUANG

"KA MITTUI A TLA THIN"

– *T.Upa T.R. Dothanga*
Farkawn



Kum 1984 ațanga tûn thleng hian Ramthar chanchinbu hi ka la ve a. A lo thlen hlan ka nghakhlel êm êm thin. A chhan chu lungchhe tak leh nuam taka mittui tlaa mi tahtirtu a nih vàng a ni.

Kan missionary-te leh ringtharten an awmnaa harsatna chi hrang hrang an tawhin mittui a tla a. Làwmna lam a lo thlenin làwm avàngin mittui a tla bawk a. Chhiar laklawh laia lungchhe tak leh làwm tak chung a Pathian hnêna țawnğtai țul chang a tam.

Editorial ațanga chhiar țanin chhiar chhuah hma chu cháng dang a kân theih loh. Chhiar chhuak vek mah ila, chhiar nawn a nuam a ni.

Ramthar chanchinbu vul zêl rawh se.

RAMTHAR CHANCHIN BU MAN CHUNGCHANG

Chanchinbu man hi Synod țaγκα kuma chhût lovin kalendar kum (*Jan-Dec*)-a pêk thin tûr a ni a, a hma lama pêk tlâk thin ni thei se, a làwmawm hle ang.

Dâk (*Post Office*)-ah, *Money Order (M.O.) form* hmangin *Circulation Manager*, Ramthar, Synod Office, Aizawl address-in a pêk theih bawk a ni.

Bank ațanga pe duh tán '*Synod Ramthar*' *SBI A/C.10665621086* -ah a pêk theih a. *Bank* dang ațanga pe chuan *IFS Code: SBIN0007058* hmangin a pêk theih reng e. *Bank* ațanga kan pêk chuan *Cir. Manager* hnênah *phone (8575178109)*-a inhriattir nghal zêl tûr a ni bawk.



SERMON

A TIH THEIH TÂWK A TI A NI

– Upa Lalnunmawia
Bawngkawn South

Bethani khuua Simona ina kan Lal Isuan chaw a kîl mēk laiin hmeichhe pakhatin a Pathian a hmu ta tlat mai! A neih ro hlu chu ui chi-ah a ngai ta lo va; mipui zingah a Lalpa hmu miao hek le! A hriak báwm chu sawh kehin *spiknard* hriak rimtui, to tak chuan Lal Isua chu a rawn thih ta mai a. Nimahsela, a bula lo awm vete chu an thin a ur ta tlat mai; anmahni ngaiha thil tha dang an kher chawp ta a. Mi dangte thil tha tih leh rawngbâwlina chu lawmpui tâk aruengin an thin a ur ta zâwk mah a nih chu.

‘He hriak hi duli 300- a hralhin mi retheite hnēna pēk zâwk tūr alâwm’ tiin an phunnawi ta a. He hmeichhiain Lal Isua chungah a thiltih that hi lâwmpuia fak zâwk tūr asin le! Hēng hun laia patling inhlawhfaten nilēnga an hlawh zât chu ‘duli’ a ni a. Patling kum khat hlawh zât zet mai chu kan Lal Isua bulah hian a sawh keh a, a thih ta vek mai a ni a. Lalpa tána a tih theih tâwk hi a va ropui êm! Hetiang zât zet insenso huama Lalpa chungah a tih hi eng dang vâng a nih ka ring lo; Lal

Isua hi a hre chiangin, a hmangaih êm vâng a ni ngei ang. Kan thiltih thinte leh kan tih lohte hian Isua kan hmangaih dân a tilang chiang ber âwm asin.

Kan Lalpa chuan he hmeichhe thlavâng hi a hauh tlat; “*Eng mah tih suh u; engah nge in tihbuai ni? ka chungah hian thil tha tak a ti a ni...A tih theih tâwk a ti a ni; ka taksa hi phùm tûrin a lo hnawih lâwk a nih hi. Tichuan, tihtak-meuhvin ka hrilh a che u, khawvel zawng zawngah khawiah pawh Chanchin Tha an hrilhna apiangah he*

hmeichhe thiltih pawh hi amah hriat rengna tùrin an sawi ve zêl ang,” a ti. Tùnlai thleng pawh hian kan la sawi ve zêl a nih hi maw! Kan tih theih tâwk kan tih hian Lalpa hi a va lâwm òhin êm!

Mi sual pakhat chauh sim chungah pawh hian Lalpa leh vana mite hi an va lâwm òhin êm! Fapa tlan bo haw leh kha a pa khân a va lâwm tehlul êm! Koh-phanho zingah hian mi fel 99, sim chuan tùr nei lote hi kan òhu nghûk mai ang tih a hlauhawm hle. “Simin ka lo kal e, aw Lalpa, ka sualna ngaidam rawh,” i ti òheuh teh ang u.

Mi sualte hma-ngaihtu

Lalpa : Pharisa Simonan kan Lal Isua chaw eiah a sáwm a. A kíl lai mêkin chu mi khuaa hmeichhe sual pakhat chuan a hriat velel alabasta báwmin hriak rímtui a rawn keng a; Lalpa hnungah òap chungin a òing a. Lal Isua hi a hmangaih mang e áw! Hriak rímtui chuan a chulh a, a mittuiin a kephah a far huh a. A samin a hrûksak a, a kephah chu a fáwp ta

ngawih ngawih mai a. Chaw eia sáwm tu Pharisai-pa rilru chu a dang leh ta daih mai. “Ka mikhualpa hi zawlnei a nih chuan a dektu hi hriat áwm tak a ni. Mi sual a ni si a,” a ti rilru leh ta.

Lalpa chuan he hmeichhe thlavâng hi a hauh leh ta a. Simona hnênah chuan a sual zawng zawng a ngaihdam tâk thu a puang ta rup mai a ni. Pa pakhat pawh hian Lalpa hmaa a sual òhinzia leh, chuti chunga Lalpana khawngaihna leh a hmangaihna in a ngaihdam hnehzia thlarauva a han hriat chhuah tâk chuan, “Lalpa min hai em ni?” a ti e, an tia lawm! Keini ang mi sualte hmangaihtu Isua kan nei hi a va làwmawm êm! Kan Bible meuhin ‘hmeichhe sual’ a ti a ni. Chutiang chu ni mah sela, Lalpa hmangaihna puan inah hian a la leng êm êm a ni.

Keini mi sualte hi Pathianin kan aiawha thi, Kristaah min en a, “An sualna leh átnate chu ka hre reng tawh lo vang, an tán ka Fapa a thi si,” a tih miao si chuan tu nge

thiam loh min chantír thei ang le? Krista thisen chuan kan sual zawng zawng min sil faisak thin a nih chu. “Ka hming pu, ka mite chuan an awm dân sualte an kalsan chuan an sualte ka ngaidam ang,” Lalpan a ti. Lal Isua thusawia lung tilêng tak mai chu, “A bo chu in hmu leh hma loh chuan tu nge zawng lo vang che u?” tih hi a ni. Lalpa hian bote hi a lo va hmangaih êm ve áw! Mi sualte lamah hian Lalpa hi a tang asin. Mi sual, khawtlângin an endawng tawhte pawh hian Lalpa an pan chuan an thlavang a lo hauh tlat a, a hnar ve ngai lo.

Lalpan tih theih tâwk ti lo a hua : Matthaia bung 25-a talent tehkhin thu hi kan Lal Isua sawi a ni a. Tipung lo leh tih theih tâwk ti lo hremna hi a na telh tawlh hle mai; “Páwn khaw thimah paih chhuak rawh u, chutah chuan tah leh ha thial chu a awm ang,” a ti thuai mai a nih kha. Talent khat pawh hi tihpun tham a ni hle asin maw le; tûnlai pawisa

chuan ₹ 3,000/- hu a ni a. A tipung lo leh a tih theih tâwk a ti lo hi Lalpan a hua a ni. A tipung tate chung a malsawmna leh làwmman erawh hi chu a duhawm hle mai.

I tih theih tâwk kha sit suh :

Kan Lal Isuan thawh-làwm báwma an thlâk ri ruih ruih lai chu a en reng a. Chûng kárah chuan zak chung chungin, mi hriat hlau takin hmeithai rethei tê hian dâr tangka dere pahni a rawn thlâk lai chu Lal Isuan a lo hmu a. He hmeithai pachhe tê thiltihah hian Isua a ngawi thei ta lo va, a au chhuak ta a ni. Thawh-làwm thlâk ri ruih ruih zingah ‘he hmeithai hian a thlâk tam ber’ tiin a *result* a puansak ta a nih chu. Tûn thlengin Lalpa tâna petute zingah pe tam ber *record* a la hauh reng a nih chu. Lei lamin ‘pe tam’ an tih thin hi vâh lamin ‘pe tlêm’ min ti ang tih hi a va hlauhawm êm! Tih theih tâwk kan tihah hian Lalpa a làwm thin tih hi i chhinchhiah ang u.



BUHHMUN AṬANGIN MANIKBOND PASTOR BIAL VISION 2030

– Rev. Vanlalliana Sonset
i/c Manikbond Pastor Bial

Manikbond Pastor Bial hi Assam ram huam chhúng Langkaih Lui (Longai river) ruama awm a ni a. Mizoram, Assam leh Tripura inrina bul, Kanhmun aṭangin kilometre 16 vêl leka hla a ni. Sawrkar inrelbâwlinaah chuan Karimganj District, Assam huam chhúngah a awm a; kohhran inrelbâwlinaah ve thung chuan Cachar Tlangram Presbytery hnuaia Bial pali zínga pakhat a ni. He Bialah hian Kohhran Puitling pali leh Branch Church panga kan nei mék. Kohhran mi zawng zawng hi 759 niin chhúngkua 162 kan awm mék bawk. A hnam zâwng chuan Bru khua pakhat tih loh chu Zo hnahtlâk, Chorei leh Ranglong-te kan ni. Anmahni khua theuhvah chuan chi bil ṭawng an hmang a, Bial huap *programme*-ah chuan Mizo ṭawng kan hmang thung.

Eng nge Manikbond Bial Vision 2030 chu?:

Kan Evangelist pakhatin February, 2015-a House Visit a neihnaah Chorei Hindu in pakhatah hian a lût a. In neitupa nèn an titinaah chuan, tu mahin Isua Krista Chanchin Ṭha an la hrilh miah lo tih a hre ta a. Chu *report* chuan mi a barakhaih hle a. Tichuan, Manikbond Bial huam chhúnga Zo hnahtlâk khaw 17-a

ringlo *census* kan bei ta a. Hetah hian mi 2,340 vêl lai mai chu Kristian la ni lo, pi leh pu sakhaw bia, Hindu sakhuaa lût mék an awm tih kan hmu-chhuak ta a ni. Mizoram aṭanga hnai tea awm, kan Zo hnahtlâkpui heti zât Isua Krista ringtu la ni lo an awm tih hriat hian rilru a tihrehawm hle. Tichuan, “**Kum 2030-ah chuan Manikbond Bial chhúnga Zo hnahtlâk**

ringlote hi ringtuah siamin Isua Krista ke bulah kan hruai thleng tûr a ni,” tiin rinna thutiam kan siam ta a ni. Hei hi **Manikbond Pastor Bial Vision 2030 chu a ni.** He *Vision* tihhlawhtlin nân hian heng kawng nga (*Five Prong Strategy*, kan tih mai) hmang hian hma kan la ta a.

I. Direct Evangelism :

Hei hian ringlote ina kala Pathian thu sawi te, *film show* neih te, *crusade* neih te a huam a. Uar lehzualin hei hi kan kalpui a, a rah pawh kan seng mék.

II. Medical Ministry :

Kan Bial chhúngah hian Nurse pahni an awm a, anni hian an awmna khua bâkah khaw dangah te *clinic* an hawng a. Damlo an awmin an inah te kalin an tlawh/kan thin a. An rawngbàwna hmang hian ringlo tam takte thinlung Krista lamah vuak dûpin a awm mék.

III. Education Ministry:

Tûnah hian Craft Centre pakhat kan nei a. Hei hi

Craft Teacher pakhatin enkawlin kum tin hmeichhe zirlai 10-in puanthui an zir thin a. Kan zirlaite hi ni tin devotion neihpuiin, puanthui an zir laiin an thinlungah Isua Krista Chanchin Tha kan thui hnantir a. He Centre hi kan rawng-bàwnaah a tangkai hle. Chutih mék laiin kan member Kristian ni tawhte leh Kristiana kan siam mékte tu leh faten Bible an chhiar theiha Kristian awm dân thate an zir theih nân Mission School pakhat tal hi chu nei thei ila kan rawng-bàwna hian a va sâwtpui dawn êm, kan ti vawng vawng thin. Pathian hnênah Mission School kan neih theih nân bâng lovin kan tawngtai zêl dawn.

IV. Economic Mission :

Manikbond Bial chhúnga awmte hi Sawrkar *development programme*-in a thlen phâk lohte an nih avângin kâmding chhúngkua tlêm tê tih loh chu a tlângpuiin an khawsak a harsa hle a. Ei leh bâr lama hmasâwnna

kawnga kan rawngbàwl-pui theih tùr Pathianin min pe zêl a. Tûnah hian SELZ Foundation, Chan-mari, Aizawl te nèn tang kawpin kan ringtharte vawknôtê vulh tùrte kan pe a. Dîl neite chu sangha chi kan ngaih-tuahsak bawk. Tin, kan thalaite sipaia an tan theih nân kawng min kawhhmuh a, Awareness Campaign min neihpui tùrin Sainik Welfare mi leh sa sawm mék a ni.

Hei bâkah World Vision India-ten Manik-bond Water Supply Scheme tâna Project Proposal kan siam chu min pawmpuiin, cheng nuai 11 sengin hna min lo thawhsak a. Tin, kan Bial rawngbàwl-na kal tlanga kum 2013-a an khaw Hotupa (Headman) chawpa Chorei mi 40 vêl lai mai Kristiana an rawn inpekna khua, Sateldung chu motor tê chi lût thei tùrin kawng min laihsak bawk a, kan lâwm hle.

He khuaa kan missionary kaihhruainain electric current luh theihna tùrin sawrkar

official-te dawr an niin, he kan dilna hi min rem tihsak a, work order a chhuah têt tawh tih thu kan dawng. Kristianna hi economic development thlentu a ni tih hi kan au hla pakhat a ni.

V. Kohhran sawh nghehna : Kohhran leh Branch Church kan din tawhte sawh nghehna kawngah hetiang hian hma kan la:

(i) Kohhran hruaitute *Leadership Training* neihpui bâkah committee leh inkhâwmpui ngaih pawimawh kohhran mite zirtir.

(ii) A ram mite *campaigner*-ah hmangin *Finance Campaign* kohhran tinah neih chhuah. Hei hian thilpekah hma min sâwntîrin tûn Financial Year-ah chuan chéng nuai nga Synod-ah kan chhúng lût thei ve dawnin kan inhria.

(iii) Aizawla Synod hmun pawimawh Bial chhúnga pahote September, 2015 khán fanpui an ni. Hei hian anmahniah nghehna a siamin kan

ṭangkaipui hle. Tin, KṭP General Conference, Champhaiah kan ṭhalaite a tam thei ang ber hruai tum a ni. He General Conference-ah hian Inrinnei zànah kan Bial Zaipáwl zai tura ruat an ni nghe nghe.

(iv) Central KṭP leh Kohhran Hmeichhiaten ram pum huapa tih tūr an tih ang chi hi hlen ve zēl kan tum.

(v) Sunday School pawh kan phāk ang zēlin a ṭha thei ang bera kalpui a ni a. Ringthar khuaah chuan puitling leh naupangte Pathian thu an hriat dân a inan avàngin, Puitling zirilaibu atân pawh Beginner zirilaibu kan hmang mai a, a kum lehah Primary Zirilaibuah kan kai chho ve ṭhin.

Tlipna : Manikbond Pastor Bial Vision 2030 hi Pathian pawhin min hriatpui niin kan hria. He

Vision rilrua dah chung a rawng kan bàwl chhoh ṭanna hi ṭhla riat (8) emaw vēl chauh a la ni chungin ringthar 22 lai kan neih belh a. Hēng ringthar zingah hian Langkaih ruama Zo hnahthlāk Hindu zinga an Bāwlpu (Ochai) hman lar ber te, an Hindu Roreltu (Kalim) te pawh an tel a ni. Tin, kan Kohhran inrelbàwl dân leh rawngbàwl dân ṭha an tih avàngin mi 54 lai chu páwl dang (*Catholic, EFCI, Baptist*) aṭangin kan Kohhranah an lo inpe thar baw.

Mizoram dai lawka kan Zo hnahthlāk pui, ramhuai hnēna Ar thisen leh Vawk thisena la inthawi ṭhin a sâng tel an la awm tih min hriatpui a, kum 2030-ah chuan hēnghote hi Isua Krista thisen thiltihtheihna zâwk ringa, Kristian an lo nih ve theih nân bâng lovin min rawn ṭawngtaipui ṭhin dawn nia.



† Ringthar neih chak vanga Bible-in Pathian chungchang a tar lan dân hi a nihna pela i sawi emaw a nihna tak ḥliah zawnga i sawi a nih chuan, chu chu Chanchin Ṭha ni lovin bumna a ni. – John Piper-a

CHHIM BIAL CHAKMA CONVENTION 2015 REPORT

– *Lalhmingmawia*
Asst. Area Promoter
Synod Office, Lunglei

A hmun : SHMS, Bungtlang South
A hun : 29 Oct. – 1 Nov., 2015

Director : Rev. Malsawmsangzuala *i/c Bungtlang 'S' Bial*
Speaker : Rev. Sujindro Chakma *i/c Damdep Bial*
Secretary : Pu Lalawmpuia *E/T Bungtlang 'S'*
Manager : Pu Albert Lalhmangaiha *Area Promoter*
Treasurer : Pu C. Lalremruata, *Hdm., Bungtlang 'S'*

Inbuatsaihna : Bungtlang South Pastor Bialin Organizing Committee dinin sub-committee hrang hrang a siam a. Ni 15 October aţang kh n *pandal* an buaipui  anin Bial ch  ng kohhran tinte leh thawktute an hnattlang nghal char char a, ni 26.10.2015 kh n *pandal* chu peih fel a ni a. He *pandal*-a kan zar t r silpaulin 50 lai Pu Lalremruata Kullai (B.D.O., Lunglei)-in min hawht r a, a chungah kan lawm hle.

Sawi hmaih hauh loh t r chu a thlengtu Bial, kohhran leh thawktute an inbuatsaihnaah an  ang ho  a hle mai a, kum dang zawng a in office lam pawh kan ha dam. He *convention*-ah h an chawp h l angreng takin Dr. Lalringzovi, J.W. Hospital leh a staff-ten *free clinic* neia min  aw awm t r thu kan dawng a, kan phur leh ual.

Convention  an a ni ta : Ni 29 October, 2015 z n a ang n programme  an a ni a. Mi 200 tal lo kal thei se, tia Pathian hn na kan dil chu a  an z nah pawh beisei aia tam lo kalin palai riak l t mi 360 zet kan nei nghal a ni. Lo la thleng lo, kawnga lo kal m k an awm ti  kan hre baw  a, kan l wm hle a ni. Palai

riak lût hi Chakma ringlo – mi 166; Kristian ni sa – 157; thawktute nèn kan vaiin mi 419 lai kan ni.

Oct. ni 29, 2015 (Ningani) zàn dár 6:30-ah inkhâwmna hmasa ber neih a ni a, Director-in inkhâwm a kaihruai a, inlâwmna thu a sawi nghal bawk a. Synod Office, Lunglei lam aṭanga kalte motor chiangkuan loh avàngin inkhâwm an rawn nang thei lo nâ a, Director leh thawktu dangten ṭha takin inkhâwm prog-ramme an lo neihpui thei a ni.

Convention kal zêl:

Zirtâwpni chawhma lam aṭangin inkhâwmna leh *counselling class* te tuang takin kalpui a ni a. Bungtlang South Kohhran Hmeichhiate ‘Ṭawngṭai Khawl’-ah an ṭang a, thawktu a remchâng apiangte nèn an ṭawngṭai ṭhin a. Ṭahnem an ngai thei hle. Chu chuan convention inkhâwm a châwm nung êm êm bawk a ni. Palai lo thlen belh an awm zêl bawk a. Mi 500 vel lai (a thlengtu kohhran leh thawktute nèn) kan pung khâwm ta mup mup mai a.

Zàn tin inkhâwm banah Chakma *cultural programme* hmanpui an ni a, an tuipuiin nuam an ti thei hle. Zirtawpni zingah hian John William Hospital *staff*-ten Camper-te pualin *Medical Free Clinic* an nei a, inèntir an ṭha thawkhat hle a. Thisen *test* aṭangin malaria an hmu tam hle mai. Khaw chhúng mite tán Inrinni-ah *free clinic* neih a ni leh a, mi 150 vel inentir an awm a, malaria vei (Medical duty) te hmuh nèn mi 60 vel lai enkawl an ni.

Kan Speaker Rev. Sujindro Chakma hian a hnampui Kristian lote a vei hle mai a, thusawi-naah pawh tisa leh thlarauva Kristiante hamṭhatna a sawi hnem hle mai. Inrinni zàn inkhâwmah hian ringthar baptisma chang mi 34 kan nei a, a hnua chang lehte nèn mi 40 ringthar baptisma chang kan nei. Lalpa chu fakin awm rawh se. Inrinni leh Pathianni hian ruah tlêm a sûr a, boruak a tivâwt hle mai a. Programme han tiṭhuanawp tham erawh a tling lo va, a tâwp zàn thlengin tuang takin hun

kan hmanpui thei a ni. Convention hun chhúngin inkhâwm apiangah missionary zaithiam kan neihten Chakma hla sain min awi reng bawk a, zaipawl leh *group singing* nei thei an rawn awm nual bawk. Tin, inkhâwm apiangin Pathian fak nân lamtual a khat tha thei hle bawk a ni.

Pathianni zànah phei chuan solo 4, group singing 2 lai ngaihthlâk a ni. Kan speaker leh Rev. F. Lalrinnunga, Administrative Secretary-ten tha hnemngai takin Pathian thu an sawi thin a. Pathianni zân inkhâwm ban hian *cultural programme* hmanpui tawh lovin zaikhâwma Pathian fak nân hun hman a ni a, zânlai dâr 12:00-ah kan tin thei hrâm a ni.

Tlángkâwmna : He Convention hi Chhimtuipui Area bîk atân a vawi hnihna a ni a, camper-te hi tleirawl lam an ni tlangpui nain hlawhtling thawkhatah kan inngai a. He convention-ah hian Upa H. Zoliana (S.E., P&E Dept.) leh a nupui Dr. Lalrintluangi-ten min rawn

hmanpui thei a; *free clinic* min tihphuisui mai bâkah *convention* chhúngin power lamah harsatna kan nei lo va, a làwmawm hle. Tin, a thlengtu Bial Pastor Mal-sawmsangzuala, Pro. Pastor Isaac Lallawmkima leh C. Lalremruata, Hdm. leh *school Staff* te tan rualna leh inpêkna fakawm kan ti takmeuh a ni.

BDO-in silpaulin tam tham tak min hawhtir mai bâkah min rawn ho thei thin te, Police O/C leh a staff-ten min rawn vil thin te hi kan thla a muang hle bawk a ni. KTP leh Pavalaite inpe tak leh nuam ti takin he convention-ah hian an thawk bawk a, Kohhran Hmeichhiate tawngtai lama an thahnemngaihna te làwmawm kan ti hle bawk. “Inkhâwmpui kan hman zawng zawngah nuam kan la ti ber, convention leh hunah hetah rawn nght leh ngei ngei ang che u,” tiin an sawi hial a. “Pathian thu thu le,” tiin Nov. ni 2, 2015 khân inngai leh inthlahlel takin kan inmangtha ta a ni.

RAMHLUN NORTH MASIHI SANGATI RAWNGBÂWLNA

– R. Lalrothuanga
Secretary, Bial Masihi Sangati

Ramhlun North Pastor Bial Masihi Sangati Meet Vawi 14-na chu Aug. ni 23, 2015 khan Ramhlun North Kohhran Biak Inah neih a ni a. He Meet neih hma hian he Meet pual hian Bial chhúngah Home Crusade neih a ni a. He Home Crusade leh Meet-ah hian Gospel Thunder Team member-te, hnam bik Evangelist-te leh Bial dang Evangelist-te sawm an ni. Home Crusade hi zan li (Aug. ni 17,18,20&21, 2015) chhúng neih a ni a, mi 253 hnênah Pathian thu hrilh a ni.

Kan Bial chhúnga hnam dang awm zât chu hetiang hi a ni:

1. Ramhlun North : 135
 2. Ramhlun Venglai : 48
 3. Ramhlun East : 70
- [Home Crusade-a kan tha sen zât hi 280 a ni.]

Ramhlun North Pastor Bial Meet hi ni 23.11.2015 (Pathianni) nilengin Ramhlun North Kohhranah neih a ni a. He Meet thupui hi 'Chhandamna' (Udhar) (1 Tim 2:4) niin speaker chu Rev. Darkhuma, Ramhlun Venglai a ni.

Zíngkàrah hnam dang unaute hruai khâwmin Bial chhúnga

Fellowship member te, KṬP member-te leh Kohhran Pavalaiten ṭahnemngai takin hnam dang unaute an rawn hruai a. Mi 76 rawn hruaiin Govt. Primary School-ah Bible film te enpuui Pathian thu hrilh an ni a. He Meet-a lo kal zawng zawngte tán hian tûkṭhuan leh zanriah siamsak an ni. Kan Meet-ah hian Presbyterian Hindu Bible School-a zirlai mi 32-ten nilengin min ṭawiawm bawk.

Chawhnu leh zànah biak inah inkhâwm a ni a, speaker-in thuchah nung tak a sawi ṭhin a ni.

Bial chhúng Fellowship pathum aţangin zaipáwl kan nei thei a, Hindi Bible School Zaipáwl leh Ramhlun North Bial Zzaipáwlte an zai bawk. Pathian hnathawh ropui tak avàngin he Meet chhúng hian mi 16 laiin baptisma an chang a ni. Lalpa chu fakin awm rawh se!

Ramhlun North Bial Standing Committee te, Bial Masihi Sangati Committee te leh Ramhlun North Kohhran te inpêkna leh thahnemngaihna avàngin Meet hlawhtling tak kan hman a. Kan hnam dang unaute zinga Chanchin Tha hrilhna hun tha Pathianin min pêk avàngin Pathian hnénah thinsung takin làwm thu kan sawi a ni.



MISSION FIELD-A HMEICHHE TANGKAINA

– *Nl. H. Lalbiakhluni, Evan.
Kharsang, Arunachal East*

Hmeichhia chu hmeichhia a ni a, Thuthlung Hlui hunah chuan sakhaw rawngbâwlina lamah pawh an chan a sâng lo hle. Thuthlung Thar lamah hian Paula pawh hian a la dah sâng vak chuang lo va. Tûn thleng hian hmeichhiate chu khawvêl kalphungah hniam zâwk an ni tlângpui. Hmeichhe zingah fing, fel leh lehkha thiam, changkâng tam tak awm mah se, Bible aţanga a lan dânin a tlângpui thu-ah kan nêp zâwk a, chu chu kan kohhran kalphungah pawh a chian a ni.

Mahse, hetih lai hian kan Synod Ramthar Board hma lâk dânah erawh thawktu tam zâwk chu hmeichhia kan ni

thung. Kan kohhran kalphungte leh kan hnathawh dân, hma lâk dân han ngaihtuah hian thil inkawkalh eng emaw deuh chu a awm hian ka hria a, rilru tihzauh deuh nân ka hmuh dân ka han ziaak ve a ni.

1. Kohhran enkawl-na lamah *committee* leh serh leh sâng thil bîkah chuan mipa an òul thin a. Missionary hmeichhia kan nih chuan kan tel a rem lo. Pasa neite chu an pasalte an tui emaw tui lo emaw, an hria emaw hre lo emaw, an tel lâwp lâwp a ngai a. A thawktu, Pathian kohna hriaa *train* tawhte ngei pawh *committee*-ah tel a rem ve lo va. Nupaah pawh mipa chu a chungnung zâwk an ni. Nu berin pa ber chu an lo zir tawh thil aṭangtea thurawn an pêkin pa tam tak chuan 'hmeichhe sawi tùr a awm lo' tih an chin avângin thenkhat phei chuan thil ṭha nia an hriatte pawh an sawi ngam lo a ni.

Pathian hian a kohhran a hmangaih êm a, a kal hrâm hrâm a ni. Kohhran din ve tawhnaah chuan ṭan a na ve ṭhin si a. Sikul kan neihna hnaivaiah phei chuan Kohhran Hmeichhe lam chu Evangelist Teacher-te hian an enkawl zovin an ṭha hle baw si nèn, hmeichhe *evangelist*-te

phei chu member satliah angin kan thên ve mai mai a ni. Synod-a hlan kai pathum pawh hi hre Chiang tâwk lo hle mah ila, Manipur hi kan hlan kai hmasak kha an ni a, an hnam pawh a changkâng deuh zâwk kan ti thei ang. Mahse, khatih hun lai khân tûnlai hun ai hian mipa thawktu an ṭahnem ni ngeiin a lang. Hmeichhia, a bîk takin, *evangelist*-te kan tel ve leh sawi ve rem lohna tam tak a awm.

Chuvângin, kohhran kal dân leh hmalaknaa intodelh lam thlengin a nghawng niin a lang. Synod hranga siam mai theih tùra lang – kohhran tamna Bialah chuan kohhran kalphung leh intodelhna lama kaihruai theitu tùr mi pakhat tal dah ni thei se a ṭha hle ang. A nih loh pawhin Pastor-te hian kohhran kalphung hi eng eng emaw *training* mai ni lovin ramthar a nih angin tê lua awm lovin kohhran mil leh phâk tâwkin zirtîrna pe tam lehzual ta se.

2. School lam han thlir leh ila, kan sikulah hian hmeichhe teacher an tam zâwk tlângpui a, discipline lam thuah pawh hmeichhia aiin mipa bawkin an tih that duh chuan a tâwk an thiam zâwk niin a lang. Tin, hnam hrang hrang kâra awm kan ni a, zirlai nu leh pa lakah mipa chuan zah an hlawh zâwk em áw ka ti deuh a ni. Sikul building enkawl chungchang leh compound enkawl naah pawh mipa hna hi a tam hle.

Tin, kan Mission sikulah chuan lehkha zirtír ringawt lova an puitlinna tûr kawng dang han zirtír dawn pawhin mipain an daih lo lutuk ta mah mah niin a lang. Eng emaw hnathawh nikhuaah pawh hotute tán hnatláng koh a inthlahrunawm duh hlein a lang baw. A tlângpui thuin kum 2000 hma lama mite aiin a hnu lama mite chu lehkha thiam hle mah se hna dangah tih theih leh tih tum a tlém deuh niin a lang.

3. Heti a nih chuan hmeichhe *evangelist*-ho chu inban ngawt a rem si lo va; chuvângin, mipa tluk lo mah ila, kan tangkai ve deuhna tûr nia lang chu – a ram thim zâwk, kohhran la din lohna lamah mipa aia hmeichhia kan luh theih remchan zâwkna leh awlsam zâwkna lamah hian che tam ve ta ila a fuh zâwk ang em?

Missionary lâk chungchangah chuan a la thintute sawi hmangin hmeichhia hian *interview*an thiam zâwk tlângpui niin a lang a. Field-ah pawh hmeichia chu enkawl kan nawm zâwk vâng emaw ni kan tam zâwkna chhan hi le áw? Pathian kohte hi hriat thiam vek hi a harsa si a; mahse, kan Synod kal-phungah thil kan hmanhmawh lutuk ngai lo va, ngun takin a ngaihtuah hmasa zâwk thin. Chutiang deuh chuan thawktu lâkah pawh hian fimkhur leh deuh se, tiin ka han tîti ve nual a nih chu.

† Kristian tam tak chu mihring mantu pawh an ni tawh lo, sangha khawina báwm (Aquarium) vengtu an ni ber tawh. - Paul Harvey

www.mizoramsynod.org

PI RAMI KHA AW!

– *Lalthlangliani*

Unnao, Lucknow Mission Field

Pi Rami hi Lucknow Mission Field hawn tan tirha a bul tumtute zinga mi kan ti thei awm e. A hming tak hi Vanrambeisei a ni a, Rami MIZO a inti deuh kher thin. Pu Chhingvunga (L) leh Pi Zaliani (L)-te fa sawm zinga a palina a ni a. Kum 1952 khan Vanchengpuiah a piang a, tunah hian a unaute hi Mission Vengthlangah chengin Jubili Kohhranah an awm mek a ni.

Kum 1976 khan Mizorama *Pioneer* hna thawka rawn awm, Sugarh Singh-a nen an innei a. A pasal hian Pukzingah baptisma a chang nghe nghe a ni. Vanduaithlak takin fa an nei lo hlah mai a, Mizoram atang chuan India hmar lam Ladakh-a an awm hnuah a pasal te khua Garhi-ah amaha awmin a pasal hi a zui ta lo va, a thih thlengin Garhi-ah hian a awm ta a ni.

Pi Rami hi a pasal neih hma chuan ‘mi hlim’ niin rawngbawltute pawh a lo zui thin a. An inneih hian a pasala chhungte hian hnam dang, Kristian ni baw, mo an nei hi an

duh lo em em a, tihhlum hial te pawh an duh thin a ni. A pasalin hun eng emaw chen a awm bosan lai hian an tiduhdahin kut te an thlak a, thisen chhuah khawpa an vuak avangin Police Thana-ah te a zualko (report) hial tawh a ni. Isua thlalak a tar te an pawh thlaksak a.

Ei tur te an pe duh lo va, a tawrh nasat em avangin a pasalte in chhuahsanin amahin a awm ta a. A lung a leng thei em em a, hetih hun lai hian chaw pawh ei hlei thei lovin, ‘Ka mittui hi ka chaw a ni mai’ a ti thin a ni. Kristian Hla Bua, “Ka Tlantu khawiah nge a awm” tih leh, “Eng vangin nge mipuite chu” tih hlate

hi Hindi-in a let a; Vai khuang (*dholak*) bénga a zai chu *cassette*-ah a *record* a, ngaihthlâk tùrin tûnah pawh a la awm.

A theih ang angin naupangte leh thenawm nuhote Pathian thu a hrilh thin a, Sunday School te a neihpui thin. Amah chauh Kristian ni mah se Krismas leh Good Friday te, Tumkau Ni te a ngai pawimawhin a serh a; naupangte ko khâwmin ei tûrte a buatsaihsak thin.

Garhi khuah hi Mission pâwl dang dangte pawhin an lo tlawh ve thin a. Chûng mite chu a lo mikhual a, a theih ang angin a tanpui thin a; a tangkai êm êm thin a ni. Kum 1992/93 khân Rev. Lalchungnunga, Delhi-a a awm laiin Lucknow Bethel Church-ah programme pawimawhah a lo kal a. Chumi tum chuan an Director chuan Mizo nu a awm thu an lo hrilh a. Ani chuan a va tlawh chhuak a, Mizo tawng pawhin a lo tawng thei tawh lo va. Pastor hnênah chuan, “Kan khuahh hian Mizo thawktu tlangval guitar perh thiam

rawn dah ula. Hêng lai khuah hi chu kan hneh vek thei ang,” a lo ti a. An khuah leh a chhehvêl hian Chanchin Tha hi hre ve se a duh ngawih ngawih thin.

A duhthusâm ang ngeiin, kum 1999-a Lucknow Mission Field hawn tan tîrh kum khân Field Secretary Rev. Vanlalbela ten an va zawng chhuak nghal a. Biak in sak nân an leilet ram chu an lo pe nghal a; mahse, an ram hi khaw daifêm deuh a nih avângin inkhâwm tùr hmuh zawh loh an hlau va, an pawmsak ta lo va. Chutih lai tak chuan an kawt chiah ram chu an rawn zawrh ta hlauh mai a, kan mission tán a lei nghal a. Chutah chuan biak in sak a lo ni ta a, Biak in sirah evangelist *quarters* leh a chungah Nurse *quarters* sak chhunzawm zêl niin, hêng *quarters* sak chhûng zawng zawng hian an nupain neitu chan changin an hahpui êm êm a. Anmahni in tùr ang chiaha ngaiin an thawk thin. Missionary-te an duhsak êm êm a, an tán liau liau an tam, maian leh behlawi hmun a siam a. Ar

a vulh a, Mizoram aṭanga Field rawn tlawh rêng rêng chaw eitur lovin an chhuah ngai lo va; missionary-te tân an insengso nasa thei hle a ni.

Kum 2001-ah medical lam rawngbâwlina nei ṭanin Garhi-ah hian ka awm a. Ṭawng ka la thiam loh avângin ni tin *clinic*-ah min ṭhutpui tawp a; nau chharna apiangah min kalpui ṭhin. Zâna damlo min rawn pan apiangten anmahni an kai tho hmasa zêl ṭhin. Rawngbâwlinaah chuan an inpumpêk tawp ṭhin a ni. Crusade leh programme pawimawh apiangah nu leh pa chan an chang takmeuh va, “Missionary-ten harsatna in tawh chuan kan nupa hi min hmachhawn hmasak phawt a ngai ang,” an ti hial ṭhin. Amah hi an chheh-vêlah hi chuan nu lar leh thiltithe i ve tak a ni a; *retailer* an ni ṭhin. Chutih laia an area-a Pradhan (VCP) hi suam hmang (Gunda) ṭhin a ni a, miten an hlauh êm êm laiin ani chuan a nêl êm êm a. Vawi khat pawh Pradhan hian

khawnvartui a rawn dil a, a pêk duh loh chuan thahah a vau va. Mahse, ani chuan hlau hauh lovin a lu tansakah a lo vau let ve a. Chutiang khawp chuan a zâm ngai bik lo; duh duhin a tir kual vêl thei zâwk a ni. Vawi eng emaw zât VC-ah te a in-*candidate* bawk.

Taksa bawrhsâwmna hrang hrang a neihna hi a rei tawh a. Amaherawhchu, a bawhsawp tak tak erawh chu 2013 kum chanve bâwr vêl aṭang khân a ni a. A tai (*pile*) hi a ṭha lo va, doctor-in zai tûr an tih pawhin a ngam tawh lo va. Lung (heart) lam ṭha lo leh pum ṭha lo a nei bawka. Tichuan, a natna chu lo zual zêlin ni 29 December, 2013 khân chatuan ram min pansan ta a ni. A damloh chhûngzawngin Garhi-a Mizo missionary-ten an buaipui a; a boral huna vuitu neih loh mawlh kha a hlau ṭhin a. Mahse, Lucknow Mission Field-a Field Secretary Rev. F. Lalhmingthanga hovin bial hrang hranga Mizote leh Field Worker-ten ropui takin ama chenna in chhûng ngeiah phumin an thlah liam ta a ni.

A thusawi pakhat ka theihngilh theih miah loh chu, “Vaiho zingah kum tam tak ka awm tawh a. Hêngho hian ka thil neih chi hrang hrang min rûksakin min chhuhsak thin mah se, keimaha LAL ISUA awm erawh hi chu tu man min chhuhsak thei tawh lo,” a ti a ni. A hla duh deuh zinga a duh êm êm pakhat chu,

Kei chu ka Lal duh ka lunglai hnêmtu, hmun khawharah pawh Aman min awmpui ang’ tih hi a ni. Lucknow Mission Field-a awmte chuan min awm lohsan ta hi kan uin kan ngai takzet a, a tel lo chuan kan field hi ruak huaiin kan hre hial a; mahse, kan tum vânuamah khian kan la intâwk leh ngei ang.



CHAKRATA BIAK IN KHA

– Upa H. Lalchungnunga
Bawngkawn Shalom Veng

Kum 1961 khan WF School, Clement Town-ah Engineer Section-ah ka awm ve a. India leh China indo tan lai kha a ni a. Indian Army zirtirtu tûrin Sub. C. Chalhmingthanga (L), Chhinga Veng ARC-a mi a awm ve a. Khatih lai khan USA sawrkarin India sawrkar kha silai leh ralthuam dangte a rawn pe a, chumi ralthuam dawngsawng tûr chuan Pu Hminga nen chuan Chakrata khuaah kan kal dun a. US Army pahnih (Surgeon)-in an rawn dah a. Chakrata khuaah chuan ralthuam chu kan inhlan fel a. Anni (US Army) khan India thil chu boruak chauh an hmang a ni.

Kan thlah fel hnuah chuan Chakrata khua chu kan fang a. Mualdung pakhat, hmun zawl in chhâwng thla diatah kan kal a.

Tlângdung hmun lo rem laiahte chuan biak in, lung hlira sak pathum lai mai, indawt thla thliaiin a lo awm a. A velte chu tihfai a ni a, biak in

chhung lamte pawh tukverh aṭangin kan bih a, furniture a la awm vek a. A bul velah chuan thira siam *bench* te a awm bawk a. Kan lung a leng dun êm êm mai a. Kei lah pek chuan biak in dâr inkhai luang luang te chu ka ît khawp mai a.

A vela *bench*-ahte chuan kan ṭhu a. “Hmanah chuan Sâp nula tlângvalte an lo ṭhu ṭhin tawh ang a. Tûnah lah chuan pakhat mah hmuh tûr an awm tawh si lo va,” te kan ti a, kan lung a leng ngei mai. Lung hlira sak a ni a, han chhe mai mai tûr a ni bawk si lo va. Khuua mite tu mah lah chuan an ûksâk si lo va. Biak in thlangta berah ni tain ka hria, chowkidar kan hmu ta a. Ani chuan, “Dehradun

aṭangin Pastor emaw ni a lo kal a, arawn en fel ṭhin,” tiin a sawi a. Hêng bâk chu a hre bawk si lo va, duh anga a chanchin pawh hre ṭha lêm lo chuan kan ṭinsan ve ta a.

Tûn hnu hian ka ngaihtuah lêt a, ka kalpui Pu Hminga lah a lo boral ta bawk si a. Uttarakhand vela rawngbâwtuten hre Chiang thei se, tih te rilruah a lo lang a. Ka lung a leng êm mai a, ka han tharthawh leh a nih hi. Kei tak hi remchang awm se chu kal ka la châk êm êm a ni.

Tûna Rajpur Road-a *Reformed Presbyterian Theological Seminary*-a zir chhuak ka ni a, April ni 23, 1975 khan ka graduate ve a ni.



C.T. STUDD-A (2 Dec. 1860–16 July 1931)

‘Cricket Lalpa’ tia an koh ṭhin, missionary ropui leh hmingthang tak lo ni ta, CT Studd-a kha a in (bûk) tê tak teah a awm a. Amah chu a chak tawh lo hle a. Zàn khat chu khawnvâr êng lo tak hnuaiah Bible a chhiar a. A inlêngpa chuan, “Ka pu, Bible i chhiar a ni maw?” tiin arawn bia a. Ani chuan, “**Ni e. Ka Lalpa thupêk tih hmaih ka neih leh neih loh ka zawng a ni,**” tiin a lo chháng a!

A thih dawna a thu ziah hnuhnung ber leh a thusawi hnuhnung ber chu “**Halleluia!**” tih a ni.

RAMTHAR FEH

1.

1. **Field hming** : Tripura Mision Field
2. **Khua** : Udaipur
3. **Tlawh hun chhûng**: Ni 16-21 March, 2015
4. **Tlawhtu** : Khawzawl Vengsang Kohhran
5. **Kal zât** : Mipa 10, hmeichhia 1
6. **Tlawh chhan** : Thawktu tlawh leh hnathawh
7. **Hnathawh** : Nokoli Biak In hmun sam leh Takma Biak In kawng leirawhchan phah (68x6 ft)
8. **Senso** : ₹ 37,320/-
9. **Lâwmawm lam** : Pu Roney C. Lalrinmawian a Sumo tlâwm takin min hmantir a. Kolasib-a an inpuiah (Pu C. Liankunga te chhûngkuain) kal lam leh haw lamah chawhlui tuihnai tak min lo siamsak a, kan lâwm hle mai. Kal lamah Pecharthol-ah thawktuten zân dâr 11:00 thleng min lo nghakin zanriah min lo siamsak a, kan lâwm hle mai. Haw lamah Chakma Ghat-ah thawktuten tûkthuan min lo siamsak bawk a, hlim takin kan kîl ho va, kan lâwm hle a ni.

Hêng bâkah hian kan chhuah aţanga kan haw leh lamah kawng tluana min hruaitu Pathian chungah kan lâwm takzet a, lâwm thu kan sawi a ni.

10. Report tul dang : Nokoli Biak In hmun hi ₹ 5,500/- in kan leisak a, campaign nân ₹ 2,000/- kan pe bawk. A kal zînga mi thahnemngaiten thawh khâwmin ₹1,400/- dang campaign nân an pêk belh bawk. Bialtu Pastor Kiran Debbarma, Pu Zolura Tochhawng leh thawktu dangten hlim takin min lo dawngsawng a, kan lâwm hle mai.

*Upa P.C. Chuauţhuama
Team Leader*

2.

- 1. Field hming** : Karbi Anglong Mision Field
- 2. Khua** : Hamren, Badong, Umnam & Umchera
- 3. Tlawh hun chhûng** : Ni 1-7 April, 2015
- 4. Tlawhtu** : Ramhlun Sports Complex Kohhran
- 5. Kal zât** : 15
- 6. Tlawh chhan** : Good Friday & Easter Sunday hmanpui
- 7. Hnathawh** : Nokoli Biak In hmun sam leh Takma Biak In kawng leirawhchan phah (68x6 ft)
- 8. Senso** : ₹ 63,700/-
- 9. Làwmawm lam** : Mission Field kan tlawh theih avàng te, an rawngbàwl na dân (Indirect leh direct evangelism) a hmuna kan hmuh theih avàng te leh missionary-ten ramthara feh chhuakte min dah pawimawh avàng tein kan làwm hle.

10. Report tul dang : Rev. C. Satliana leh Upa P.C. Lalngaihawma-te hovin ni 1.4.2015-ah Aizawl chhuahsanin Silchar Mission Compound-ah kan riak a, thawktuten min dawngsawng tha hle a, kan làwm hle. A tûk chawhnu herah Hamren-a Pastor Lallungmuana quarters kan thleng. Bialtu Pastor leh compound hruaitute remruat angin Hamren, Badong, Umnam leh Umchera-ahte insem darhin hun hman a ni. Good Friday tûk hian Karbi sakhaw hmunpui **Ronghang-Rongbong** kan tlawh a. An puithiamte remtihna in hnehna au rualin kan tawngtai rual. Easter Sunday hian Hamren-ah ruai kan theh. Ni 6.4.2015-ah Hamren chhuahsanin a tûk Thawhlehniah dam takin Aizawl kan thleng.

Karbi Anglong Mission Field hi KAGAA (Synod thar) atán hawn ni tawh mah se, an la puitling tâwk lo va, kohhranhote tawngtaina an la mamawh hle.

Rex L. Zate

Ramhlun Sports Complex Kohhran RT Comt. Ziaktu

3.

- 1. Field hming** : Home Mission North
- 2. Khua** : Damparengpui
- 3. Tlawh hun chhûng** : Ni 6-10 April, 2015
- 4. Tlawhtu** : Chanmari West Kohhran
- 5. Kal zât** : Mipa 21, hmeichhia 1
- 6. Tlawh chhan** : Hnathawh
- 7. Hnathawh** : School building 15x18 ft-a tihzauh
- 8. Senso** : ₹ 37,890/-
- 9. Làwmawm lam** : Ni 6 April, 2015 zingah ruahsur hnuaiiah chhuakin kawng lakah harsatna eng mah tâwk lovin tluang takin Damparengpui kan thleng a. Headmaster, Pu Vanlalhruaian W. Phailengah min lo hmuak a, Damparengpui kawtchhuahah Bialtu Pastor John F. Lahmingthangan min lo hmuak bawk a, an chungah kan lâwm hle. A hmun kan thlen veleh sikulah kan mutbute dah felin hna kan thawk nghal a. Kan hnathawh hun chhûng zawngin thawktu (missionary)-ten thahnemngai takin min thawhpui a, an chungah kan lâwm hle.

Damparengpui Kohhranah hian mi 644 leh danzawhkim 364 an awm a. Kohhran Upa 6, Pem Upa 2 leh Tual Upa 2 an awm a, missionary 11 an awm bawk. Biak In lian tha tak an sa mék bawk. Kohhran changtlung leh phuisui tak niin an lang a, a làwmawm hle.

Chhawntluanga

Chanmari West Kohhran Ramthar Committee Ziaktu

4.

- 1. Field hming** : Home Mission North
- 2. Khua** : Salem Boarding
- 3. Tlawh hun chhûng** : Ni 5-9 May, 2015
- 4. Tlawhtu** : Hunthar Kohhran

- 5. Kal zât** : Mipa 15, hmeichhia 4
6. Tlawh chhan : Hnathawh
7. Hnathawh : Thawktu quarters sak. Châk awm sa hmanga sak a ni a. Cham chhúngin ruah a sur duh hle a, hna a tikhaihlak thin. Beisei ang thawh theih loh cháng a awm fo. Mi indaih tâwk loh vângin duh angin zawh hman a ni lo. A chung rangva chih mai theiha kalsan a ni. A hmuna awm chhúngin zing dár 6 aṭanga ṭanin, tlai lamah khuain a zir chuan thim thlengin thawh thin a ni.

8. Senso : Sumo pahnih hman man ₹ 12,000/-, ei in atána senso ₹ 12,270/-, hna thawh chhunzawm nana pawisa hnút chhiah ₹ 5,000/-, a vaiin ₹ 29,270/-. Ei in atána bazar thil – buhfai, dal, etc. ei bang eng emaw zât hnutchhiah a ni bawk.

A hmuna hna thawh chhúngin rim takin kan thawk nâa, kan hlimin kan lâwm hle a, kham lo takin kan hawsan. Nilai zàn (6.5.2015) inkhâwmah hun pêk kan ni a, Upa T. Vanlâwman thu a sawi a, haw dawn zànah inthlahna hlimawm taka hman a ni bawk.

Upa T. Vanlâwma

Chairman, Hunthar Kohhran Ramthar Committee

5.

- 1. Field hming** : Home Mission South
2. Khua : Kawrthindeng
3. Tlawh hun chhûng: Ni 18-25 May, 2015
4. Tlawhtu : Kanan Kohhran, Aizawl
5. Kal zât : Mipa 21, hmeichhia 2
6. Tlawh chhan : Hnathawh
7. Hnathawh : Nurse Quarters (30'x15') sak
8. Senso : ₹ 1,87,185/-

9. Làwmawm lam : Kan Work Camp neihna atána kohhrante ṭawngṭaina leh inbuatsaihnate Pathianin mal a sâwm a, harsatna eng mah awm lovin kan hnathawh kan zo thei a, a làwmawm hle mai.

Kan hmanraw ken tùr te, zanriah tùr leh kawng laih thara kan kal theih nana min buaipuitu – Pu Laldinpuia Tlau te, Pu Jerry Lalchhuanawma te leh Pu Zothanpuia te chungah kan làwm hle. Motor leh labour-te rawn thawha min puitu, Contractor Pu Sanga, Saitual chungah leh Nl. Marini, Darnamtlanga missionary-a awm, kan work camp min rawn puitute chungah làwm thu kan sawi bawk a ni.

Thawktute leh kohhranhoten min lo dawnsawmnaah leh kan hnathawh chhúng zawnga an mi ṭawiawmnaah làwm thu kan sawi bawk a ni.

10. Report ṭul dang : Kawrthindeng khua hi in 170 awmna Bru khua a ni a. Kohhran pawl pathum a awm a, sikul pawh pathum a awm bawk. Presbyterian Kohhran hi a lian ber niin 1987 khán a ding ṭan a ni. Kohhran chhúngkua 87, dan zawhkim 191, member 387 leh missionary 8 (E/T 7 leh Nurse 1) an awm a ni.

Kan hnathawh chhúngin inkhâwm ṭum nga awmin thuhirilna hun min pe vek a ni. Kohhran inkhâwm a hlimawm a, puitling inkhâwm an tlêm deuh ṭhin nâ a, naupangho erawh inkhâwm an ṭhahnem ṭhin viau a ni. I ṭawngṭaipui ṭhin ang u.

R. Lalthansanga

Kanan Kohhran Ramthar Committee Ziaktu

6.

1. Field hming : Home Mission South

2. Khua : Saibawh

3. Tlawh hun chhûng: Ni 25-31 May, 2015

- 4. Tlawhtu** : Lungpho Kohhran RT Comt.
5. Kal zât : Mipa 11, hmeichhia 1
6. Tlawh chhan : Hnathawh
7. Hnathawh : Sikul repair, Dispensary sak that, etc.
8. Senso : ₹ 47,260/-
9. Làwmawm lam : Kan Kohhran ațanga missionary-
a kalte thawhna hmun kan hmu thei te, thawktuten
kan mamawh engkim min ngaihtuahsak a, min
țawiawm reng avâng te, Bungtlang S Bial Pastor kuta
ringthar baptisma chang kan hmuhpui thei te leh a
kalte Pathian hruainaa harsatna tâwk kan awm lo
te, kohhran leh mi mal min țawngțaipuinaahte
lâwmawm kan ti.

10. Report țul dang : Saibawh khua hi in 200 vêl an
ni a. A zâtve zet hi Buddhist sakhaw bia an la ni.
Ram lâk tûr a la tam hle. Bungtlang S Pastor Bial
chhûnga awm an ni a. Thawktute inpêkna a ropui
hle. Hetih rual hian thawktu Quarters sak that hun a
awm nual a, țawngțai leh thil tiha țanpui an ngai hle.

Lalrawngbawla

Lungpho Kohhran Ramthar Committee Ziaktu

7.

- 1. Field hming** : Cachar Tlángam
2. Khua : Winchester
3. Tlawh hun chhûng : Ni 26-28 May, 2015
4. Tlawhtu : Saikhamakawn Kohhran
5. Kal zât : Mipa 6, hmeichhia 3
6. Tlawh chhan : Hnathawh
7. Hnathawh : Huan sàm
8. Senso : ₹ 25,225/-
9. Làwmawm lam : Ni 25.5.2015 zing dár 6:30-ah
Upa Lalzaman țawngțainaa min thlah hnuin Upa
Lalrindika, Ramthar Committee Chairman hovin kan
veng kan chhuahsan a. Tluang têa kalin Winchester
chu chhun dár 12:00-ah kan thleng a. Thawktuten

min lo làwm a, an felin min lo làwm thiam hle. Riahna tùr nuam tak min lo buatsaihsak diam a ni. An chungah kan làwm hle.

10. Report tul dang : Winchester Mission Compound hi a zau hle a, kuhva kung puitling sang eng emaw zât a awm a. Kuhva hmun sâm hi kan hna ber a ni. Ruah sûrin min tibuai deuh thin mai pawh a. Zing dâr 5:00 ațanga tlai lam dâr 4:30 thleng hlim takin kan thawk a, mual hnih leh a chanve kan sâm hman a ni.

Kan camp chhûng hian Lalpan min awmpui a, tluang takin kan hna kan thawk thei a ni. Winchester-a thawktute pawhin min tawiawm thin min duat hle a, an chungah Isua hmingin làwm thu kan sawi e. Ni 29.5.2015 zing dâr 7:00-ah Winchester chhuahsanin, tluang takin chawhnu dâr 2:00-ah kan veng kan thleng leh ta a ni. Kan hnathawh bâk hi thawh tùr a la tam hle.

R. Chalkhuma

Saikhamakawn Kohhran Ramthar Committee Ziaktu

8.

1. **Field hming** : Barak Area
2. **Khua** : Patharkandi
3. **Tlawh hun chhûng** : Ni 18-25 May, 2015
4. **Tlawhtu** : Kolasib Tumpui Kohhran RT Comt
5. **Kal zât** : Mipa 10
6. **Tlawh chhan** : Hnathawh
7. **Hnathawh** : Kalkalighat Biak In panna step siam
8. **Senso** : ₹ 40,000/-
9. **Làwmawm lam** : Work Camp nei tùr hian SMB-in Ramthar Project list 2015 a siam. Barak Area-a Kalighat Biak In panna step siam tùr chu Kohhran Ramthar Committee-in kan chhâng a. Work Camp kal tùrin kan inbuatsaih nghal a ni.

A kalna tùrin Pu C. Khawlliana leh Pu Sangluaia-ten an motor an thawh a, a làwmawm hle. Ni 8 zing dár 5:00-ah Upa C. Liandailova, Kohhran Secretary-in ãawngtáin min thlah a. Tluang taka kalin Patharkandi chu zing dár 9:30-ah kan thleng a. Evangelist Lalbiaksanga te chhúngkua leh thawktu dangten min lo dawngsawng a, kan lâwm hle. Tùkthuan ei khamah kan hna kan ãan nghal a. Kohhran mite leh thawktute nèn hlim takin hna kan thawk tláng a, nuam kan tiin work camp neih hi zawngchhang tlák kan ti hle. Kan hnathawhte kan zawh hnuin ni 10 (Nilaini)-ah Kolasib lam panin kan haw leh ta a ni.

10. Report ãul dang : Patharkandi-ah hian Sâp hmun hlui, thlanmual hlui te awmin Tumpui Kohhran Pavalai Páwl pawhin a hmun sâm faiin an lo tlawh tawh nghe nghe. Hemi a nih avàng hian Synod Mission Board lam te pawh hian hma lâk ni se a duhawm hle a ni. Ngelnghet zâwka inbuna, hma lâk atân a ãha hlein kan hria. Chanchin Tãa hril tùr hian kan puan inte i zauh zêl ang u.

C. Hrangkhuma

Kolasib Tumpui Kohhran Ramthar Committee Ziaktu

COUNSELLING MAMAWHITE TÁN

Mi mal, nupa, fanau, chhúngkua, nulât tlangval, ringtu nun etc.-ah harsatna i neih chuan Family Guidance & Counselling Centre pan ãhin la, an lo ãanpui ang che. Telephone leh internet himang pazohin biakràwn theih an ni.

Mission Veng, Aizawl - (0389) 2324443; Chanmari, Aizawl - (0389) 2306693;

Vaivakawn, Aizawl - (0389) 2344324; Champhai - (03831) 234055;

Serchhîp - (03838) 226128; Kolasib - (03837) 220180

email: synodfjcc@gmail.com

MANTADARI VERANDAH FELLOWSHIP, NEPAL

Kum 2015
kum tîr lam khân
mî ang lo pakhat
chu ãawngtalsak
tûrin 7 Km vèl
ațangin Topline
Kohhranah hian
ringlo hovin an
rawn hruai a. Kar
khat zet kawlin,
chhun, zân, zing
leh hun rem-
chang dangahte
Kohhranten an
ãawngtaipui ãhin.



A zia tâk zêl avângin an khuah an hawpui ta a. Anmahni mai ni lo, an khaw mite pawhin Pathian Engkimitheia leh Chhandamtu chanchin chu hre ve se an duh avângin, rawngbawlina nei tûrin Topline Kohhran chu an sâwm ta zêl a. Chawlhni tin a súr a sa hnuaiah Topline kohhran mite chu mi tualhte inkhâwmna buat-saihin an kal ta ziah a. Rajbangshi hnam an awm ve avângin Ektiasal kohhran pawhin 25 Km vèl zeta hla ațangin an va inkhâwmpui ve ãhin a.

Ni 02.08.2015 khân mî eng emaw zâtin baptisma changin Pathian khawngaihna azârah ringthar pawh neih belh zêlin, tûnah hian ringtu mî 39 an nei tawh a ni. Ni tin inhlawhfaa eizawng an nih hlawm avângin Biak In hmun lei tûr leh Biak In sa tûr chuan an tâna vâna rah ang a ni. Biak In awt ve hle mah se mi verandah leh kawtlai leh inrel te chu kar tîna an inkhâwmna neih chhun a la ni mai si! I ãawngtaipuina, Mantadari Verandah Fellowship (House fellowship pawh a la tih ngam chiah lo) hian an mamawh hle mai. Chu mai a la ni lo, an khaw ãhenawmahte an theih ang anga Chanchin T̃ha lo hril vein, kohhran din leh mai theih tûr khuah pawh an nei leh tawh!

DARNAMTLANG KOHHRAN BIAK IN LEH SIKUL

Hei hi Darnam-
tlang Kohhran Biak In a
ni a, Kohhran Sikul
atân hman a ni bawk.

Missionary
pahnih - Kohhran leh
mî mal chawm an
thawk a ni. Bungtlang
South Bial, Home Mis-
sion South chhung a ni.



Postal Regn. No MZR/46/2015-2017

RNI Regn. No. 40889/88



Missionary Orientation 2016 - Zirlalte leh Zirtirtu thenkhatte

If not delivered please return to:
The Manager
Ramthar Chanchinbu
Synod Office, Aizawl, Mizoram,
India. Pin - 796001

To

**Published by Rev. K. Lalrinmawia and Printed at the Synod Press, Aizawl on
behalf of Ramthar Association, Aizawl, Mizoram. Copies- 30,000**